

藝

舟

雙

楫

藝舟雙楫附錄目錄敘

附錄一上

皇誥授奉政大夫河南涉縣知縣候補同知贈資政

大夫都察院右副都御史兼兵部侍郎江南河道總

督徐君墓志銘

嘉慶乙丑

清故中憲大夫山東東昌府知

府原品致仕前充沂曹濟兵備道軍功加一級熊君

行狀

道光乙酉

額侍郎別傳

壬辰

皇誥授榮祿大夫戶部

左侍郎提督江蘇學政周公神道碑

壬辰

故大臣昭

文吳公墓碑

癸巳

皇誥授朝議大夫禮科給事中吳

君墓志銘

丙申

附錄一下

清故 予告 太子太保文淵閣大學士食全俸

晉太子太師在籍除名大庾戴公墓碑

庚子 魯撫部

別傳

辛丑

趙提刑家傳

辛丑

皇詔投資政大夫廣東

布政使司布政使軍功隨帶加一級熊公墓志銘

辛

丑皇詔授朝議大夫江蘇松江府知府加二級蔣村

李君墓志銘

癸卯

皇詔授通議大夫按察使銜陝西

鳳翔道查公神道碑

甲辰

李鳳臺傳

乙巳

附錄二

甘泉訓導鄭先生碑陰述

嘉慶 丁卯

錢獻之傳

丁卯

周節

婦傳戊辰邵生碣文己巳余九傳丁丑皇誥封奉直

大夫河南永寧縣知縣加三級國子監生魏君墓志

銘己卯一彬益和尚像贊道光姚節母傳己丑需霖

雨和尚塔銘庚寅皇敕封孺人山東館陶縣知縣張

君妻湯氏墓志銘辛卯皇敕授文林郎山東肥城縣

知縣丁君墓碑甲午繆孝子傳乙未募贖歐洲坊歸

觀贊啟庚子劉國子家傳癸卯方補德傳甲辰清故

文學旌德姚君傳甲辰梅蘊生傳甲辰劉烈婦楊氏

傳乙巳

附錄三

程孝婦傳

嘉慶丁巳

睦履平墓表

丙寅

雲鶴老人小傳

丙寅

節母盛氏家傳

道光乙卯

儀徵縣學生王君妻劉孺人

墓表

戊子

清故四川邛州火井司巡檢楊君墓志銘

戊子

皇崇祀名宦陝西白水縣知縣告改江蘇青浦

縣教諭王君墓表

庚寅

武進董定園先生墓銘

庚寅

清故候選兵馬司正指揮魯君墓志銘

庚寅

汪冬巢

傳

壬辰

趙承德墓志銘

甲午

清故例封太孺人贈徵

仕郎蕭君妻劉氏墓志銘

甲午

趙江寧家傳

丁酉

清

故例授承德郎吏部常調府通判廩貢生謝君墓志

銘

書毛節母朱氏行狀家傳墓志後

戊寅

清故

處士吳君星宇墓表

己亥秋銓課子圖記

敘曰易象有言觀乎人文以化成天下天下化成君用之盛節迺歸功實於人文其視文母乃已重乎然玩其說人文曰文明以止則知其文以止天下之邪而歸於正雖君相必受成焉是以聖人任在茲之重晚作春秋以維世運文成數萬其指數千左氏復據實書紀事與言以全付託而素臣之職乃盡爲百世文祖然左氏麗經以行後起莫敢僣似者至司馬氏當五百之期錯綜十代以作史記其文直其事核不虛美不隱惡遠則當夏制法之微言近則過秦規漢之明論備之矣史家

取法焉故後世言文首推司馬氏以迄近世史館成例人必歷顯職事與言必據官文書非是不得闖入傳中讀其傳以求其人之心術學術與當時種德播惡之迹皆不可見於是欲徵信於家傳而家傳必出素識之稍有器譽者名之以時貴縞紵夙授人事豐腴難以言文直事核矣况自命載筆者未必解事於所事之得失終始本不了然以道徇人苟取悅於求者幽光不發儒效無稽淫諛之辭興勸誠之道熄矣然則傳志碑狀史家者流雖稱美不稱惡與史例少殊苟能稱美不過其情又不以虛飾之公家言惑人觀聽卽時諱小惡亦善善

從長之義也有本有末輒近所難若其吏才無害而內
行不修則當援春秋美齊桓之例詳稽成效而一言不
及其家事其有清操自完雅量容衆短垣不逾而澤無
所究則必詞稱其分旨寓於言亦有性不吝嗇頗事任
卹而餘財旣出盜蹠汚染故非良家衡其輕重無當節
取未便峻拒宜從婉辭斷不可氣折勢焰心移繫援苟
穢翰札以得罪名教者已僕常謂吾人不知自愛舞文
亂德較之試官賣科名獄吏賣法律罪爲尤重蓋庸劣
倖獲無辜被冤禍福祇集其身是非猶在公論若碑志
勒之金石傳狀垂於簡冊果得筆勢駿利議論明達者

爲之遂爾骨馨泉壤名艷通都實惡以久遠而漸除虛
美以誦習而逾盛顯貽君子之譏陰受鬼神之譴可不
愼歟僕少本不殖學由師心謬被名流推挽乞傳求題
者相踵唯以性好品別人材搜羅軼事偉論亮節不問
明陋雖其雌伏茅檐寄迹籬下而出處趨舍竟係興壞
又有人僅中材職非機要當狂瀾共倒之時猶能持正
自衛詳其所涉則地方興壞之故亦因明白下至閭里
獨行閨閣貞苦攷覈既真必悉紀錄爲前哲鬯流芳爲
後來樹標準師保如臨不緣求請其應求請者亦多習
故深知並非刪節來狀故有行述年譜言累數萬而文

中止採及世系科目官階生卒年月子姓名職者世固
有一言一動卓爾可傳且必不可以不傳而子孫不知
或知之而引嫌慮患不敢入狀其狀中刺刺不休大都
尋常且多虛妄迹其所虛妄者事未必美而真美額隱
諱不言僕以一人之耳目心力其焉能使當代賢大夫
士之行業盡有載述而必布聞哉至於情無可却而行
治不必符記載或性情足供描寫或先世宜追稱述或
欸懷當陳締結或語言別具指歸取蹴微瀾滋生奇趣
文家狡獪時亦間出其有聞聲相思奉狀乞言詞出入
子多近誣先採訪有徵剪裁斯下如其距遠居僻無可

考詢則必謝彼潤筆辭以不文五十年來庶幾無媿古
昔有言苟能制作文章亦可謂之爲史凡以迹關得失
非具達事變之識懷舊俗之情者固不足以與於斯文
也故略摭舊稿之符合鄙說者錄附藝舟雙楫之後當
世有識苟存觀省或亦有當葑菲之采云爾

安吳四種卷第十四上

藝舟雙楫卷第七上

附錄一上

皇誥授奉政大夫河南涉縣知縣候補同知贈資政大
夫都察院右副都御史兼兵部侍郎江南河道總督
徐君墓志銘

君諱振甲字解時姓徐氏其上世家餘姚後徙德清之
新塘爲德清人曾伯祖某禮部侍郎伯祖某工部尙書
考志丙舉雍正甲寅賢良方正科起家甘肅礪伯縣知
縣遷岷州知州丁母憂以兵事留遂卒于官妣嵇氏封

宜人君侍岷州君宦遊而君妣病亟君刲股以療之既
差病渴甚索瓜醫氏不可竟不起君以故終身不食瓜
岷州君既卒君奉三殯歸葬服闋遊吳恭定公甘肅按
察使司幕恭定故與岷州君同舉制科甚器君屬屢試
被放卽爲君援江賑例指捐縣丞分發江蘇補江寧縣
縣丞膺卓薦擢清河縣知縣君初蒞清河而老壩口決
黃溜懸注逼治米船不得達時山東壽張縣民王倫爲
逆徵調堵截兵水仍至衆情惶惑君集小舟載乾糒以
次賑給諭國戶糶米有無藉乘機搶於肆君盡法懲之
商民得相安平市如故未幾山陽劫掠四起而清河獨

否人以此多君初君署句容縣事廉知猾吏蠹漕下車
卽發其奸民輸將如限後二十年句容以吏舞法興大
獄溯厯任十數獨君無弊調江都獲鄰境巨盜擢同知
候補而君適引疾旣痊謁選改河南涉縣知縣縣徭例
於冬月合圍取皮革獵戶以此苦民君卽爲除之調署
信陽州值築青龍岡口阿文成公以大學士持節督工
檄君開引河君不事追呼而集衆常多歲事常速文成
以爲能時君長子端身任畚鍤文成卽命以本捐銜投
効青龍岡工工竣補蘭儀通判君遂解組就養蘭儀署
端擢知淮安府迎養君道出清河居民扶老携幼扳輿

舖飲如家人觀者夾路嗟歎嘉慶八年九月六日卒於
端淮徐兵備道署年七十有五配贈夫人錢氏早卒生
二子長端都察院右副都御史兼兵部侍郎江南河道
總督次章候補通判前署桃北同知晚納側室王氏生
一子竜二女俱幼王氏後君一歲卒孫七鏐鏐鏞鏞
鏐鏐曾孫一淳端章以某年月葬君於某原以錢夫人
王孺人附述君行而徵文於余以志君幽余按狀而系
之銘曰

伊嗟資政明德維孝名臣循吏先業克紹爰以試丞洊
登佐郡視事廿年不改清慎學則旣優仕乃不顯知止

曰明初服是踐迺哲嗣謹率義方心勞力瘁爲民保障嗣有良苗君則藝之君有嘉實嗣則濟之君澤維何曰諮行道舊民懷恩涕灑丹旆粵宜祭社豈必葬桐奉茲阡表無念崇公

宮保素昧生平在友人黃心庵所見余文延訪二年始得招至節署以其先公窀穸之文相屬旣得稿具衣冠肅謝曰後人讀此文必謂先公爲鄉里之善士州縣之循吏宜其有後則徐氏世世子孫拜賜多矣乃出浙中先達所撰至七首率長二三千字並以稱揚宮保過多不洽意卒用小子文入石司馬請題顯

人名官保曰今日之顯人未必能顯於身後慎伯必顯於身後者且安知其終不顯耶錄稿附記以志真賞

清故中憲大夫山東東昌府知府原品致仕前充沂曹濟兵備道軍功加一級熊君行狀

曾祖某 皇永康州學生員馳贈中憲大夫直隸大順廣兵備道

祖光遠 皇雍正乙卯鄉試副榜貢生贈中憲大夫直隸大順廣兵備道

父恩紱 皇直隸大順廣兵備道 特贈太僕寺卿

廣西太平府永康州東城第一圖熊方受年六十四狀
君字茲介號夢庵其先世隸四川巴縣君之高祖遷永
康爲永康人三傳至太僕以進士起家備兵大名被逆
賊段文經之難陽湖毛燧傳爲碑銘論其功甚辨晰太
僕舉三子君爲冢嗣好學夙成下筆諛諛有生氣乾隆
庚子領鄉薦庚戌成進士癸丑授檢討在詞館八年改
刑部主事君少侍太僕宦游歷府道署十餘年更吏事
初至刑部卽硜硜持議嘗諍於堂曰用法宜核情罪不
當揣

上意爲高下益便吏胥以是不能得題缺計俸選臬部

員外郎入直軍機處題升郎中提調嘉慶辛未科會試
旋擢江西道監察御史不數月

簡授山東兗沂曹濟兼黃河兵備道故事道員於士民
赴訴者准提則爲屬吏所不快率皆違例轉發至批答
詳稟率照所可否君一概絕去衡以事理訴詞始有獲
伸者嘉慶十八年九月防河在工次聞曹縣之變未知
虛實卽募土夫勇敢者二百名星馳赴難聲稱率并兵
五千人賊望風棄城分逃至縣境之扈家集李家庄范
水坑蔡家大小樓各處屯集君以故得入城繕守具督
民勇搜勦先後敗賊目李克讓蔡五倫曹永貴蔡立言

李克順李名揚之衆惟李克讓得逸餘悉就擒事聞奉
溫旨拜花翎之

賜仍議敘軍功加一級十九年調赴睢工督挑引河同
官以卑約太甚忤使者并劾君奪職既竣事降一等開
復二十年補東昌府知府山東自乾隆六十年

恩赦民欠之後至嘉慶八年清查州縣積虧至百二十
萬巡撫承宣以爲憂乃議視缺肥瘠歲提節省銀三十
二萬兩歸司庫通力合作以六年彌補虧項其餘以津
貼買補倉穀不敷者奏奉

俞允既積數至百萬而上游不循成案非有力莫能邀

撥補其暫署承宜者至有視事一二月而動撥數十萬
州縣忿其不公繳解益懈至十四年彌補期滿而虧數
反增至三百餘萬遂減節省之數爲歲十八萬兩具奏
展限三年及十八年限又屆滿而虧數又增至五百餘
萬時值曹滑軍需肆爲濫冒十九年

上命大學士駐東督查分別准駁計實虧總數六百餘
萬而某人某任虧若干則奏交巡撫核實叅辦二十年
巡撫念虧數重大一出員名恐成大獄先將虧數較輕
之四府三十餘員名開單補奏得

旨甚嚴切而事不能已乃議提冬羨彌補授意六府二

州先造冊短報虧數以結前案冬羨者山東州縣一歲所需取給於漕餘之強名也其致規於本管也頗厚各府州顧戀觀望莫能實舉其議者東昌所轄十州縣皆有漕若先事卽細核屬虧實數卻所致規立程式除辦公必需之外盡提羨數以補舊缺及二十二年入府州冊齊各員虧數皆不至干重辟然惟東昌之冊得其實二十三年冬

恩旨赦免民欠查辦半載不能得要領承宣爲屬吏所愚遂照報部奏銷冊數將三次清查奏明之官虧和入民欠以八百餘萬具詳巡撫據以入奏

上察其朦混值巡撫身故遂除承宣名爲民而

命提刑會同新任承宣確查剔除由新任巡撫核奏計
剔除已入清查舊虧之外又積新虧七十餘萬巡撫念
新虧之法至嚴議以墊支墊解作抵有候補府者家世
於廵撫爲恩門檄署濟南府印而續更提刑又其所能
左右之者乃相倚以傾承宣濟南遂自定冊式札致十
一府州照式造送彙呈巡撫君以關涉錢糧文案例皆
由承宣核准呈巡撫以達大部從無首府彙呈之事不
照行觸怒而巡撫以君爲詞館前輩遲疑未卽發濟南
不及待遂於二十五年春初嗾學政劾君巡撫恇懼亦

續奏君迂緩不任事以原品致仕道光紀年君挈眷來揚州爲樂儀山長僑寓虹橋之西園既蕭然無囊橐又老病兼至而戚友習受俸助者不能相諒脩脯所入僅以供任卹薪米之需每於歲杪輟講出游以取給道光四年十二月十二日赴杭州五年正月七日返棹至嘉興卒於舟次公子接凶問匍伏奉移於揚州寓前僧院以圖歸櫬娶桂林陳氏曾祖謚文恭乾隆中爲大學士稱名臣父蘭生湖北荊宜施兵備道生女子子二長孟嫻工詩而天次潤華適陳聚昌道光辛巳科舉人充景山宮教習荆宜君之孫也君旣除陳恭人服以長洲

韓氏爲繼室生子一貴齡娶江都汪氏君通達治體其所欲舉事多切究有本末旣已傷於哀樂衰羸善病氣法未能稱其志常信筆爲詩文不起稿應人求不自珍惜放失甚夥舐其篋名偶園草者尙有若干卷皆跌宕可觀采偶園者君在都所居得孫退谷宅一角之舊名也貴齡侍君宦游年幼未能詳君之行業余以鼎盛七年識君於鎮江後在蘇州在都下交益善君任充沂任東昌皆曾一過其署而山東復查民欠時余贊客承宣署司其事備知始末故掇其生平以告有道德能文章而與君交善者徵信以託不朽焉道光五年春二月三

日包世臣謹狀

額侍郎別傳

故戶部侍郎額公之卒也史館例立專傳其叔子冠軍使寶奎以狀上史臣既據其政績入

國史矣閱三年當道光壬辰予適至都下冠軍以別傳請爲予得交於公久知公深且素爲文不妄有稱述可傳信故也夫徵信莫如史然必載筆者其事專其業世所見所聞所傳聞其不真確又深通情勢達事理之所以然是以紀述籌議計畫本末賅備而筆力宏肆

以發之使讀者如見其人如聞其聲故兩漢三國之事

步史因雅集
蹟數千載猶彪炳人耳目者以其爲世業專門之私書也晉書以下大都成於後代爲時既促速又與斯役者唯論官閣罕能悉典要故英儔之士非常之謨不復瀉現楮墨間無以稱讀者之意今

國史固皆以時人紀時事矣然以謂遍採家傳及散見他說者或多恩怨抑揚不足昭詳慎故一以紅本爲據其科抄所不及軍機檔冊所不載雖

列聖憂勤惕厲與二三大臣從容論議於以救民間所疾苦爲天下傳誦讚嘆者檢核科抄軍機檔無可證驗則不得恭紀簡冊至部院題奏事件例係六堂會畫非

一人所可主名又率由胥吏具稿白司呈堂文采不足
以昭耀方來若在司員卑分例無專達卽有碩畫顯著
不登紅本唯封圻特使政得自主而決策之故多在牘
外又或中途受事未藏已移朔前則無源考後則缺委
其是否奏績能垂久遠紅本無文悉從燕闕至其人學
問所就心術所存概以傳例摹寫尤難宜冠軍之不能
已於此請也予以嘉慶丙寅夏識公於揚州時公視淮
甯已三年淮甯繁富甲天下使者驕貴簡出出則輿從
華盛倍封圻而公常從二三騎自策羸穿街巷嘗禱雨
於甘泉山步烈日中往返至三數十里梅花嶺旁有書

院爲使者課士所唯存枯槎一二公補植五百株以還
舊觀公故善其山長沂州知府歛洪梧時時相過從携
中冷泉煮茗茗輒遣騎招予或追取厨饌作竟日歡肴
蔬不過數事又嘗訪予於逆旅談笑忘倦同舍生羣驚
訝而令節纔以果餌兩器相餉曰極念吾子旅困此間
另庫歲徵且數百萬乃釐賈結納勢要物非所以待吾
子僕爲鹽政吾子爲鹽政客殆爲揚州開一生面也戊
辰秋公被議入都釐賈送至王家營環跪納曾子四紙
紙鏤各十萬公詰其何爲食曰大人節官費歲數十萬
又奏增鹽息至分半歲溢且二百萬計大人按臨六載

衆商所受恩且果千萬區區者誠不足言報稱公笑曰
我前節官費以爲今日地是攫察案所應有也請增鹽
息者爲岸猾持若短長耳若等竟以作市價是哀民以
益商我負疚滋重况分若肥耶必不聽者以狀上

聞矣是年秋公故當入

覲例以珍玩爲面貢公閱實製備僅值十六萬先期貯
京第及至都部議當差熱河不得面無所用貢公瀕赴
戍遣使悉送還揚州費腳價銀六千實已資也揚州士
民前聞公少時奔喪至山西土人醵四萬金爲賻公一
無所受事聞

達聰猶疑信相半至是乃莫不嘆其廉介矣性嗜易通
志堂所刻七十家易說皆能條列而縷舉之偶爲小詩
栩栩有蘇陸之意已巳春予初入都公已起視長蘆鮮
不相值辛未再至則公已失明家居然聞予至必迎至
中門握手坐絮語移晷及己丑春公年已八十餘予寓
外城宣南坊去公第十里公猶數見過使短童掖下車
劇譚今古事無少舛失予之所知於公者如此皆狀所
未及也其世家官階本傳例不詳備者皆按狀而次之
曰

公諱額勒布字履豐號約齋姓索佳氏先世居鄂爾坤

部落歸附後爲滿洲正紅旗人祖彰萊盛京副都統父
農起山西巡撫管提督事任安徽布政使時以辦災能
勤民有聲公雖世祿子然好讀書如寒素成童補弟子
員旋食餼入試不得於有司乃弃舉子業筮仕工部厯
筆帖式主事員外郎迴避改戶部擢郎中遍本部各繁
要差以管部五大臣密薦廉能第一徑擢本部右侍郎
管錢法堂事務則爲副都統者四護軍統領者一公
中佐領者二兼官則爲內務府大臣者二管理三山總
理工程處總理奉宸院事者各一差遣則查辦陝西軍
需報銷兼祭告西鎮山川督辦河南衡家樓大工審辦

山東陳文思控案查看天津一帶河道者各一爲司員
時一隨本部尙書查辦甘肅監糧虧空一保用坐糧廳
一加四品服總監督

昌陵工程外任一署倉場侍郎兩爲長蘆鹽政一爲兩
淮鹽政一以主事銜爲熱河副總管虛授未之官則爲
鴻臚寺卿大理寺卿者各一降譴則侍郎任內失察寶
泉局銅斤左遷本部郎中兩淮鹽政任內以前監督

昌陵工程漏參同官侵剋工價充熱河馬甲公去兩淮
時已病目再任長蘆則益亟力請解組旋失明閏二十
有二年以道光十年八月二十有五卒於私第年八

十有四

皇詔授榮祿大夫戶部左侍郎提督江蘇學政周公神

道碑

公諱系英字孟才號石芳湖南湘潭人曾祖新彩祖昭
俊考世宇皆不仕以公貴皆贈榮祿大夫曾祖妣胡祖
妣謝前妣唐皆贈一品夫人妣土累封一品太夫人榮
祿公有三子伯系蔚副榜貢生承綏廳學訓導仲系莢
早世公其季也公生二歲而孤稍長穎慧端重若成人
甫弱冠以乾隆戊申舉於鄉庚戌登第以疾故癸丑改
庶吉士乙卯授編修嘉慶戊午庚申皆充順天同考官

乙未充

實錄館纂修官壬戌充會試同考官其夏擢右贊善充
咸安宮總裁癸亥大考二等遷右中允甲子擢司經局
洗馬直

文淵閣事福建副考官乙丑充

日講起居注官其冬授四川學政擢翰林院侍講轉侍
讀進侍講學士丁卯入都供職戊辰轉侍讀學士充江
南副考官己巳以講官扈

蹕

東西兩陵五月

命直南書房九月擢太常寺卿庚午

特旨改 上書房行走充 三阿哥師傅 三阿哥今

惇邸也以大雨曠班實鐫一級仍留直八月扈

蹕熱河左授光祿寺卿旋授山西學政辛未擢大理寺

卿癸酉擢內閣學士兼禮部侍郎入都供職復人直甲

戌擢兵部右侍郎充 殿試讀卷官兼署工部右侍郎

管錢法堂事充治河方略館副總裁乙亥四月奏太夫

人諱回籍丁丑起復署兵部右侍郎戊寅補吏部右侍

郎充順天副考官己卯轉左兼署禮部右侍郎充 殿

試讀卷官兼署工部右侍郎九月降編修逾月除名勒

回籍庚辰八月

今上登極十月

特召以四品京堂起用辛巳正月至都

特派

實錄館總纂官其冬補翰林院侍讀學士旋擢內閣學士壬午正月授工部左侍郎充

實錄館副總裁二月授江西學政其秋擢任江蘇甲申調戶部左侍郎仍留任是年十一月三十日卒於江蘇學政官署時公年正六十也公金聲玉色鬚眉如畫望之若神人故事小翰詹任學政請

詔止一面公以洗馬使四川獨

召見至再知

上之眷公者深及已已

陵差屢

召對和

宸章尤稱

旨時南齋需人

上命掌院學士保薦考授曰朕意中止一周系英卿等
可將其名列入薦牘未幾上書房出缺例由掌院擇
翰林之可者擬正陪而公由

特簡且

命公曰不但授讀作詩文須教阿哥爲人居心以忠厚爲要公因奏書房例課八韵詩臣愚以爲宜令阿哥加讀資治通鑑以知古今治亂興衰之故悉民間之疾苦及 惇邸年二十公製育德箴五章爲壽其目曰清心曰學古曰知今日游藝曰飭躬 惇邸稟焉公服闋還朝年才逾五十詣燕河

行在上謁

上見公鬚髮盡白訝曰家居兩載乃至此乎嗟嘆者久之公徧歷卿貳鞠翔 內廷每奏對必移晷然愼密甚

雖子弟莫得聞之其降守編修也以是年五月朔渚土民與江西客民構釁讐殺者累日公見撫臣初奏與所聞殊異遂於

召對時力陳其狀

上命軍機大臣據公言詰撫臣

旋又調撫臣

撫福建而

撫

福建而

敕督臣

就鞠撫臣

候代未行因摺差附書問起居公以

撫臣

出都時曾約地方事有見聞必無相隱恐或受屬

吏愚弄爲地方深憂因覆書告其實撫臣

既疑爲公所

短及得公覆書而公長子汝楨附摺差致書在籍之給

事石承藻詢本案曲折并入其手因先奏陳公書事下

都察院臺

臣

當以因事屬托私罪例草職

上諭閣

臣

曰案關地方公務非伊一家私事周系英不

妨具摺再奏乃輒向本省巡撫私致書函本應斥罷念
其人樸實著以編修用公既左遷而撫

臣

續奏陳汝楨

書由是汝楨得減杖徒而公被

嚴譴然

上猶於飭督

臣

確審本案論內

殊添曰周系英平素鯁直故

今上承

仁宗畀遺老臣之至意

命公視學東南皆許以夾片言地方緊要事及人材賢

否公之視學江蘇也適值大潦災賑事向無與於學

臣

公所駐之江陰縣地瀕江災尤劇而其文武之素得民
者皆當代去公札商當路而留之並假庫銀三萬採客
米以平市價又倡捐以濟例賑之不足高堰之潰也公
卧疴已數月聞信驚悼病遂亟口授遺摺猶諄諄以河
事水患爲念嗚呼哀哉公飭身至嚴肅而性和易遇人
輒傾吐無餘體察人情至委曲專掩覆過失然嫉惡深
至於舞弊執行者無少縱而劣員較轢庠序及奸民藉
端傾陷士類公必力護持以直之若士林自涉訟或以

爭家產閭壻公則深悼教導之不行引咎自責其奏報
考試情形也事無鉅細雖案已外結必詳列無隱飾而
雨暘苗勢穀價以及勤心民瘼之員有實蹟或輿論所
可否尙未自得確據者皆分別入牘至如分校必反覆
三場主試必遍搜敗卷固亦近人所難能而不足語公
之盛節也嗟夫象罔之至變也自古嘆之豈唯君臣人
之情於夙昔親近一旦罣誤心移則前所聽受悉若被
愚舊有勤勞皆成罪狀當公之初被吏議迹疑涉私而
仁廟褒其樸實及放逐之餘復引繩直追念平素既不
以一眚遷怒又不以曲全致屈成憲是固

大聖人無必無我度越尋常萬萬者而公之造膝輪忱
其所以自給

生知亦必有在矣迄於

新政錯枉舉直擢用方隆遽爾奄忽相公之所以自處
固非曰侍從詞臣矣士患無所挾持有挾持患不遇遇
患不久公以樸誠動

天鑒者前後且二十年而所就遂止是豈非命也哉夫
人謝氏 誥封一品夫人子三長汝楨以免徒後復奉
恩旨改名銘恩副榜貢生江華縣學訓導次貽斌國子
監生次貽樸廣東候補鹽庫大使孫某某銘恩等以公

卒之次年 月

葬公於

某

鄉公家無一椽銘恩薄宦

留故土夫人率貽棊貽樸還都下壬辰四月六日夫人卒於京寓而世臣適在貽棊貽樸衰經雪泣而言曰母氏又弃養不孝今當以喪歸而先大夫墓碑未立以屬吾子世臣自着藉門下者於茲二十有五年顛躓百出重爲公知人累唯不苟爲文尙足取重後世以永公德故次其狀而繫以詩曰

天篤哲人於湘之潯弱冠起家班於鵷鷺再隲列棘一枋斯文匪惟造士抑孔勤民誠格

兩朝欲試以事天不憖遺周行空賓位并道崇澤乃求

得目營寰中志資泉下爰伐貞石以紀名德必有達者
善繼無極

故大臣昭文吳公墓碑

吳氏至德之裔以國爲氏南並浙北抵淮皆吳地而蘇
州爲都其族當望蘇然今吳氏在蘇者皆源徽徽又自
別爲歙爲休寧始居休爲唐左臺御史文惠公其後析
休之環珠村又析大斐至公考贈資政公遷昭文昭文
蘇支縣蘇之吳氏多以科目起其家或源歙或源休近
世冠蓋尤盛而其盛實自公始公諱熊光字望崑別字
槐江考諱敬貢生祖諱宏祖歲貢生曾祖諱國啟貢生

皆以公貴果贈資政大夫曾祖妣金祖妣查妣金皆累
贈夫人贈公以上皆隸休贈公初至蘇僑郡南桃花塢
實誕公既卜居昭文迎春橋以公應童子試請入籍乾隆
戊子舉順天鄉試出故吏部尚書秦承恩門秦公父
翰林學士大士推公造曰師爲假總督弟乃真總督耶
時秦公年二十四初授編修公年始十九聞者殊不謂
然後秦公以尚書署直督而公歷兩湖直隸兩廣三督
如學士言己丑壬辰兩舉中正榜授內閣中書乙未挑
直軍機處己亥擢侍讀庚子記名御史辛丑擢刑部郎
中甲辰授御史己酉擢給事中奉贈公諱去官壬子服

闕補原階嘉慶丙辰遷鴻臚寺少卿丁巳遷通政司參議
故事科道司糾劾通參班廁大九卿皆退出軍機處公以
明達勤慎當軸特保得留直

國初沿故明制票擬承宣皆由內閣至

憲廟許內外職掌官具摺奏事凡事有出入者皆奏定
然後循例具題設軍機處於門下選三品以上鴻達親
信者爲軍機大臣得挑小四品京堂以下至閣部屬之
能者爲章京每日寅刻奏事處納摺匣

上炳燭批覽畢卽發軍機處錄入檔乃

面諭大臣寄信各原奏衙門可否之名曰廷寄班次非

朝賀皆絕席會議大政皆主議實當古錄尙書事同平章之職爲政府其大學士在內閣者則承明發票題本受成事而已公初挑章京卽爲阿文成公所器前後隨文成勦辦蘭州回匪者一讞浙閩重案者二督堵東河漫口者四查閱海塘淮河者各一與文成同柄政者爲故大學士伯和珅丁巳文成薨蓋橫溢無檢至於廷寄前行專署已銜姓天下稱伯相從風盡靡以文成尤善公積不平是年閏六月

純廟幸灤陽時苗匪未靖而教匪漸猖獗訓政憂勤或午夜視事一日以

宣軍機大臣不得

命召章京唯公已上直入對稱

旨次及同直章京之戴文端公少頃伯相至

上曰軍機事日繁傅森吳熊光皆任事可在軍機大臣
上行走以助若伯相謂公官纔五品不符體制

上命加三品卿銜又曰其家貧大臣例開轎恐力不辦
上命賞戶部飯銀一千兩又曰戴衢亨出身狀頭官學
士已四品在軍機日久與吳同用吳不如用戴

上曰此豈殿試耶伯相詰塞乃承

旨然文端卒與公同加三品銜拜

命而班次仍居公下傳公任侍郎久日昨

召見詰問甚厲人其危之及上直乃知

聖意疑傳公識度或未勝大受審試而後發與一面之
頃決機授政者有間矣公在政府六閱月伯相深不便
其所爲出授直隸布政使已未春

純廟升遐和珅敗公言和珅管理吏戶刑步軍統領各
衙門日久多變舊章以營私大慙雖除猾吏仍可因緣
爲奸利亟宜逐條更正之

睿廟可公奏授河南巡撫自丙辰兵興川陝楚豫之督
撫皆駐邊界治戎務公在豫以防剿功

賞戴花翎加敘軍功三級辛酉夏擢兩湖總督壬戌春
會同各省領兵官奏報餘孽蕩平晉太子少保既回省
視事有以收受沔陽知州秦泰金及兩淮厘費二事劾
公者查驗無蹟事以白甲子夏調督直隸乙丑
聖駕東巡奉天恭謁

三陵九月十一日公接

駕於夷齊廟

賞穿黃馬褂時百文敏公已由粵撫蒞楚督任而是日
都察院有據廣東已革知縣訐控文敏在粵婪索各款
之奏兩廣總督那彥成與文敏互訐之奏亦至次日

上命侍郎扎津副公往抵楚訊得其門丁婪索狀未定
讞上復入粵撫孫玉廷言當那公以倡撫洋匪至三千
餘人擅賞匪魁李崇玉翎頂

嚴旨逮入都調公督兩廣以楚獄交托公公甫行而文
敏亦被逮公在北久粵中尤潮濕性不習漸作寒熱洋
氛劇力長治事而

溫綸屢問病狀給優假公益不敢有他請戊辰七月嘆
咭喇兵船十三隻泊香山難頭洋其酋度路利以兵船
三入黃埔并有三板船入省河聲稱咭喇哂欺凌大西
洋欲奪澳門嘆咭喇素與鄰好故派兵來澳幫同防護

而意殊巨測故事外夷兵船或寄內洋俱調兵立時驅逐公念三年來督率鎮將轉戰重洋中匪氛雖獲稍戢而師殊老故務爲鎮靜唯飭令回帆歸國傳諭大班停開艙以絕其望而夷船遷延至十月起旋奉嚴議奪職効力南河已巳春公行抵蘇城買宅城東之平橋居脊口乃赴工會文敏爲後督有

旨飭查夷船來去之由以公蕙懦覆奏遂逮發伊犁抵戍一載

特旨召還辛未授兵部武選司主事癸酉春乞病回籍其秋林逆變起

上思公議起家爲楚藩時柄政者爲軍機舊屬恐公難爲人下乃止道光戊子重宴鹿鳴

恩賞四品卿銜又六年以癸巳二月二十七日卒於平橋私第年八十有四公之初赴戍也文端已在揆席嘗與予論中外大僚優劣曰吳公謫戍可惜吳公在外治事不具論其自楚調直初入謁

上謂曰教匪淨盡天下自此太平矣吳公曰督撫率郡縣加意撫循提鎮率將弁加意訓練使百姓有恩可懷有威可畏太平自不難致若稍形鬆懈則伏戎於莽吳起所謂舟中皆敵國豈可備防哉又

皇上返自關東

駐蹕夷齊廟董師相老夫吳公同起

召見

上曰外人言不可聽此次有言道路崎嶇風景略無可
觀者今到彼道路甚平治風景絕佳人言豈盡信哉吳
公越次對曰此非讀書人語也

皇上此行欲面稽

太祖

太宗創業艱難之迹以爲萬世子孫法豈宜問道路風
景耶有頃

上目吳公曰卿蘇州人朕少扈

蹕過蘇州風景誠無匹矣吳公曰

皇上前所見剪綵爲花一望之頃耳蘇州城外唯虎丘
稱名勝實則一墳堆之大者城中街皆臨河河道仄逼
糞船擠幫午後輒臭不可耐何足言風景乎

上曰如若言

皇考何爲六度至彼耶吳公叩頭曰

皇上至孝冒天下臣從前侍

皇上謁

太上皇帝蒙

諭曰朕臨御天下六十年並無失德唯六次南巡以
傷財實爲作無益害有益將來皇帝如南巡而汝不
止汝係朕特簡之大臣必無以對朕

仁王之所悔言猶在耳文端語至此播舌良久適曰老
夫見聞所親略如此論語言勿欺而犯史記言引大體
慷慨吳公殆於近之矣戊寅巳卯間公家居余始得謁
面質文端所稱述公笑曰誠有是言然墳堆糞船兩節
乃乾隆初故相訥公奉差江浙查道覆奏之言老夫重
述之耳無足異也公又嘗語余刑賞者

聖主之大柄而其柄寄於封圻大吏以有司援案比例

求免駁斥之術處之舛矣例有一定情則萬端故遇事
必當詳細審情以施刑賞賞一人而有裨於吏治有裨
於民生雖不符例賞賞所必加也刑一人而有益於世
道有益於人心雖不符例刑刑所必及也卽不得

請必再三力爭之乃爲不負若憂嫌畏譏隨波逐流其咎
蓋非溺職而已也初公赴楚督任未出豫境遇協防陝
西兵趙士福等二百餘人以缺餉兩月逃回本營而陝
營咨會亦至公命集訊或言是皆死法公仁人且已非
豫撫可無理此公曰察其情刑苦累缺餉必矣協防非
臨陣回本營非避匿山海豈可同論哉遂杖首謀者二

人悉分撥豫邊防堵諸鎮將給與口糧既入楚有鄉勇糾搶民寨被寨民縛送三十餘人公即日受詞而駢梟之移粵甫下車李崇玉懸首菜市之信已至那公罪且不可測而東莞縣報鄭流唐率衆投誠當事者莫知所措公審其悔罪情實不可殺降以爲功婉奏請仍遵

前旨免死安插被脅者遞原籍其駐鄧也訛言賊將大至一夕揭帖遍街巷而州民復告密有村庄有期會公杖而逐之軍吏請增防公曰是賊黨肆煽惑以求便隙耳嗣得賊間訊之皆間所爲也乃大服其駐盧氏也當燈節川陝賊各萬數竄入南山迫盧氏公命大張燈賀

節賊遂遠去嘗與余論兵興以來諸將賢否首推湖北
遊擊李東宣曰不逐利能用衆老夫以訊馘知之專薦
得請而部賄不至經十五六年仍未一遷也後余遊大
名李公適居其鎮得相識洵端厚君子能任重益以歎
公之知人公娶金氏累封夫人前卒生一女其子二女
六皆側室出長子華基太常寺博士次沔基孫一兆說
昭文縣學生七女皆適名族公著伊江別錄春明補錄
葑溪筆錄三書紀所見聞滿漢諸大老言行足以維繫
國脉民命者每見余輒爲述一二事皆得所未聞然索
觀必不可曰俟老夫身後從華基取閱耳公未晬失恃

弱冠宦遊遠定省時切鮮民之憾故營生壙於虞山北麓傍先人兆域以致哀慕可謂有懷無忝者也公既卒其年十二月二十四日卜者曰宜葬公之客涇包世臣次行治爲墓碑題曰故大臣者從昌黎韓文公碑例也復銘之曰

公之始出失職居藩幸用不躋豫楚持旄俯同羣碎以刈蓬蒿逾嶺邁茨嗟哉毒淫威用不振予懷風議詩於公碑爲大臣紀

皇誥授朝議大夫禮科給事中吳君墓志銘

道光癸巳六月十有五日禮科給事中吳君卒於官乙

未正月其孤走書都下乞爲墓銘其明年二月予滯迹豫章乃得發狀次其世系閱閱行治授其孤以貞石埋君之幽以永余與君締結之誼而慰君志君系源延陵世居安徽涇縣之茂林都會祖善誘早世以君積叔弟恕恒官雲南賓川州知州加四級勳授中議大夫曾祖妣王贈淑人祖功考宗澤俱由國子生受職布政使司理問以君貴贈如君官祖妣徐繼徐倪王俱贈恭人妣王封太恭人君娶同邑王氏封安人而沒以長洲張氏爲繼室與王氏俱贈恭人再繼仁和成氏封恭人子二長慕曾廩膳生次夢曾郡庠生俱張恭人出也孫一崇

位尙幼女子子四並適士紳族女孫一未字君以乾隆
戊申入郡庠庚戌食餽嘉慶辛酉以選拔中式本科舉
人丁丑成進士改庶吉士丁外艱庚辰散館授編修歷
充 武英殿纂修總纂官 國史館協修官雲南辛巳
鄉試正考官丙戌改陝西道監察御史稽查工部寶泉
局丁亥轉掌廣西道戊子兼掌四川道稽查通州祿米
倉旋擢戶科給事中稽查戶部顏料庫己丑丁內艱壬
辰補授禮部給事中癸巳充會試監試官君食科俸已
三年例出爲監司

命將下而卒君初補弟子員尙未成童而歲科試常冠

軍成名後益力學締結知名士益謹久而益摯友于兄弟賓川君假居爲始祖墓被山隣侵占構巨獄君出死力周旋履險而不避人以爲難近世謂京職爲閒冷居科道者皆屈指計外出所言率毛舉細故以塞責若居諫垣如嚴查參罰懲辦虧缺整飭駟傳禁廟員冒濫察海運弊源劾太班縱賊要犯漏網諸摺皆上諍當路下挾外吏之私隱畧不自爲異日地其蒙

俞允飭議通行十數事多爲人所稱誦余與君居同里生同歲甲戌同試禮闈始相善余間歲輒以試事赴都鄉人宦都中者皆善予唯君最歡余邑乙未生者四人

予日月較先次則胡君世琦玉樵次君次君之族人鸞
鳳白鳳白最先成進士作宰江西玉樵入詞館卒爲山
東宰旋蹶而又已歿鳳白再宰江西適予亦以試令至
而鳳白養疴省垣旋以劾去官唯君致身清要卒亦不
得盡其才君屬望於予至切予每報罷坦如也而君憂
形於色不怡者累日子顧相慰勞君曰一進士不足爲
吾子重然非此無以使斯民被吾子之澤不能不爲天
下惜人材也雖過言非予所任亦足以見君之用心能
識其大及予得一官而君已物故傷已予羈阻揚州數
十年君出入都中取道必過從劇談竟日及君喪艤舟

刊江而予不及覺又迫物累不得歸故里致一慟於殯
宮念巨卿死友之言輒呼負負君諱敬恆字愛庭姓吳
氏年五十有九以 年 月 日葬某所之原銘曰

嗟嗟吳君志遠屆仕優益學日匪邁求民疾古心目療
蘊德未施後乃大繫銘君藏君其快藏與吾銘同不壞

安吳四種卷第十四下

藝舟雙楫卷第七下

附錄一下

清故 予告 太子太保文淵閣大學士食全俸 晉

太子太師在籍除名大庾戴公墓碑

公諱均字修原號可亭姓戴氏江西大庾縣人也戴氏祖南唐柱國忠恭公世居安徽休寧縣之隆阜紫竹園二十五傳至公曾祖諱洪度自隆阜遷江蘇甘泉縣之西浮橋戴家村祖諱時懋携二子旅食大庾考諱珮始著籍爲貢生自考以上三世俱贈光祿大夫曾祖妣

湯祖妣傳周梁嫡妣溫妣江俱一品夫人

國家求舊多世德常熟蔣氏桐城張氏漳浦蔡氏陽湖諸城兩劉氏無錫稽氏大庾戴氏皆繼世入相常熟桐城漳浦諸城無錫以父子陽湖大庾則叔姪然自

憲廟設立軍機處爲政府內閣唯受已成事是故班首百寮而不入軍機與值軍機而官在尙書以下者猶皆不得爲真相常熟兩相在未設軍機處以前祠城後再世閣臣值軍機者唯大庾而已

睿廟時輔政之久莫如文端公而公爲其季父文端之父第子官太僕寺少卿者實公伯兄文端之兄心亨與

公同以乾隆乙未成進士散館皆授編修戊戌文端繼之以首選除修撰父子兄弟並在詞垣而主試督學之差星輶交馳絡驛道路故其時階雖未崇天下翕然稱西江四戴已無與比隆盛者公年十二少僕官職矣未幾主江南試事而公力學勤苦如寒素赴課應試率徒步篝燈山寺誦讀常徹夜洎通籍以沆當軸起居服食唯具性坦白無後町履封圻居政府一切導人使盡言擇其善必推功焉舛誤則以身任務欲遮蔽人過失使得竭力比壽登耄耋以相國

予告天下達尊一身俱備地方大吏又率門下士及再

傳弟子而公恂恂怡怡與故鄉父老話桑麻尋釣弋舊蹟誘掖後進若不及接禮賓客雖甚卑幼皆敵體羣從百數居鄉黨無子弟之過莫知爲相國孫曾者漢之石氏唐之柳氏不能過也嘉慶丁巳文端超授軍機大臣戊午冬公以學差還都故事內外大臣親屬任科道者對品迴避公官掌京畿道例改六部員外郎純廟命以科道應升之鴻臚少卿候補時當

訓政燕翼謀至深遠見公才器堪大受將試以事不欲使更滯郎署也次年

睿廟親政善繼善述旣補實旋改光祿寺少卿庚辰春

擢大理寺少卿不半年累擢詹事府詹事內閣學士兼
禮部侍郎嗣是四五年間文端柄政公亦游歷卿貳及
揔理內務府工程處監修督堵馳驅無虛日乙丑冬南
河事亟黃溜奪運達瓜洲江口西風掣高堰石工瞬息
數百丈有藕粉運河碎磁高堰之謠公馳往籌度空重
糧艘以俱達丙寅秋初將北轅忽授南河正督公偕副
督徐端晝走風沙夜核文簿堵合黃河之周家堡郭家
房王營減壩陳家浦運河之二堡壯原墩高堰之義字
壩拆修惠濟正越閘大工次第舉矣拜 太子少保及
花翎之

賞而工當修治者尙多積勞遺疾不可支戊辰正月得假歸里門四月兩江總督鐵保請帑六百萬帑培汰黃堤分別銷攤歸欵

禱廟以斯事體大

命文端偕覺羅長文敬公赴工審度並

論文端曰清江距江西才二千里使事畢卿可一歸省卿叔父故文端記

恩詩有此去竹林勤問訊親似

天語到柴門之句以須與不可離之重臣

恩予往返四千里以省視公則自漢氏以來史冊紀載

所未聞見益

唐廟寄重之意已於是乎定矣是年冬公起病左遷都察院左副都御史已巳春視順天學不數月以花戶積蠹案須核辦擢倉場侍郎辛未文端薨逝給公假一月爲治喪癸酉秋杪南漕旣歸倉而東河睢漢口改東河提督時逆匪竄聚不常曹究濟當運道處伏莽尤多又微山湖蓄水短絀不敷浮送公飛飭各糧道以軍法部勒丁柁水手戒嚴儼行督河員徧導坡水集湖以濟運空艘得盡數南下甲戌春以吏部左侍郎

召途次擢都察院左都御史抵都晉禮部尙書丙子調

吏部丁丑以原官協辦大學士戊寅春入直軍機處冬授尚書房總師傅庚辰春拜文淵閣大學士晉

太子太保管理刑部七月公偕滿相托文恪公扈灤陽圍南

駐蹕

聖躬驟有疾不豫變出倉猝從官多皇遽失措公與文恪督內臣檢

御篋十數事最後近侍於身間出小金盒鎖固無鑰文恪掙金鎖發盒得

寶書公即偕文恪奉

今上卽大位率文武隨 瑞邸成禮乃發喪中外宴然
公歟歷數十年凡有興作率依據成式去已甚不事搔
爬爲激矯驚衆之行故事辦而無赫赫之名至是乃大
服及

梓宮還都都下有謂

遺詔中措語微誤者事

聞文恪及公並退出軍機處

上以公

先帝老臣派充

實錄館正總裁旋奉

命相度

萬年吉地偕故相國英和督興工作甲申公年七十有九諄三骸骨

上賜詩寵行准馳內河水驛所在官護送在籍食全俸乙酉公八十

頒聯匾珍異有加丁亥就加太子太師戊子重赴鹿鳴既奉

賜三朝耆舊之額適寶華峪地宮滲水被

嚴旨與英相國同逮籍家產合計田房衣飾才值萬餘

緒

上意漸解除名放還又十三年庚子九月初七日薨遊
年九十有五哲嗣詩亨卜以是年十二月十八日葬某
所之原與夫人合祔禮也夫人崔氏同邑人長於公二
歲前公卒十三年長子卽詩亨由縣學生蔭戶部員外
郎晉郎中侍養在籍以公故褫職旋

賞給七品頂戴齒幾曰耄依依膝下如嬰兒人呼爲小
萊子次誠亨晉亨孚亨俱前卒公以晉亨爲叔父貤贈
光祿大夫璠之後孫曾孫某某四世孫某某公衡文差

任主試者五庚子江南戊申湖北俱以編修甲寅浙江
以侍御甲子江南以侍郎辛巳順天以相國任學政者

四巳酉四川以編修乙卯安嶽以侍御庚申山東接任以理少巳巳順天以副憲任會試總裁者三壬戌以閣學丁丑以參知巳卯以軍機大臣一讀乙丑殿試卷一讀甲戌拔貢朝考卷教習庶吉士者二水利差督辦東河衛家樓大工查南河工程查勘直隸永定河應否改道查看山東張秋運道通阻及河南馬工堵築機宜者各一查勘漳河馮宿口及紅花堤應否堵築者二馬工之役時當沍寒其行也

上手賜酒一危侑以黑狐馬掛爲自來遣使所未有內官則充日講起居注官直文淵閣事經筵講官管

理戶部三庫歷翰林御史鴻臚光祿大理詹事吏戶刑
工四部左右侍郎兼戶工兩部錢法堂都察院正副堂
官禮吏兩部尚書 尚書房總師傅軍機大臣大學士
管理刑部 太子少保 太子太保 太子太師外官
則南河倉場東河各總督五十年經手事宜鉅細畢舉
唯膺

睿廟特簡欲以公之清慎誠懇變內務府積習使爲總
理而三督工程皆以獲咎嘉慶中監修

吉地失察工弊奪一官褫官銜花翎不旋踵而俱復者
聖明曲體其不逆不億也

裕陵隆恩殿專金四柱俱丈二圍大木而十五六年之頃遽致蠹朽 寶華峪泉涌地宮則皆人意料所不能及然後知舊例內務府事務不使漢大臣參預良有深意矣公門牆至盛登黃閣柄樞廷有與公相後先者躋卿寺持節鉞陟內外臺省至百數多有可稱述而陽湖李兆洛荆溪周濟秀水王良士雖不達並以博學雄文知名當代唯世臣應童試時公於本署觀風集生童至千四百而榜高第止世臣一人世臣故荒落無足道謬以名氏爲宇內通儒所齒然風檐中真賞僅一遇公世臣初隸弟子籍卽承召追陪杖屨袁浦節署尤爲朝夕

馬蘭鎮行館侍談達旦習公最久公之葬也世臣與在
執紼謹次公行治以詩於麗牲之石其辭曰有福百世
忠恭之慶自徽徂揚爲光庾嶺隋端揆席實行相事導
公先路公有猶子公齒初壯已賦鞅掌八十懸車永式
耆長日期日期頤神丘壑稱道不倦允矣

舊學公之經德持寶貴讓言各有蔽埋憂泉壤

曾撫部別傳

公諱煥字庶蕃一字賓谷姓曾氏世居江西之南豐明
嘉靖間遷南城爲南城人曾祖世麟祖邵雍正己酉舉
人父廷樞乾隆乙未進士政庶吉士散館授刑部主事

歷員外郎中總辦秋審出守山東曹州府調濟南護理
濟東武臨道俱以公貴贈資政大夫曾祖妣丁祖妣丁
俱贈夫人妣羅封恭人晉封太夫人濟南君舉二子公
爲其季生而穎異甫成童從宦都下耆宿見其詩文多
折行輩與論交乾隆庚子舉順天鄉試辛丑成進士改
庶吉士派習

國書甲辰散館授戶部主事丙午丁濟南君艱戊申服
闋補湖廣司入值

軍機處擢貴州司員外郎壬子

京察一等奉

特簡授兩淮鹽運使卽充

欽差大學士慶文恪公隨帶司員至江南讞獄勘辦事
竣次年始蒞任視事嘉慶丁卯擢湖南按察使戊辰調
湖北庚子擢廣東布政使乙亥擢貴州巡撫丙子以太
夫人年高乞養壬午養親事畢

上以兩淮疲憊日甚

特命公以巡撫銜巡視兩淮鹽政丙戌

召還以五品京堂候補庚寅卒於京寓年七十有二配
同邑元氏累封夫人子二長在挺捐職同知次協均國
子監生並年少績學能不失世業孫五

某某

公性尤嗜

詩至老不輟自漢魏六朝三唐兩宋以及近世聞人專
集彙集皆悉研究辨哲其得失公以世家子弱冠卽涉
詞苑值樞廷游登封圻居華臚清要者數十年未嘗歷
拂逆失意之境而其爲詩顧深悉民間疾苦微言激射
頗挫沈鬱絕無珠翠羅綺之氣染其筆端咏山燒有曰
層巒從此瘦春草幾時生望岱有曰須知天下雨還望
一山雲寄意遙深有寒峻專家所不及溯公宦轍留揚
州者至久其地居水陸之衝四方名流所集聚自趙宋
時韓歐劉蘇相繼守土賓譙之盛輝映古今閱數百年

至

國初周櫟園侍郎監督鈔關遠紹逸響而王阮亭尚書繼以司理揚州誠心求士士歸之如流水之赴壑二公皆履卿貳立治績而世人之艷稱者乃在鈔關司理時誠哉其難之也後又百年盧雅雨朱子穎爲都轉稍續前緒至公而大盛是以揚州人士以公丰采爲上接阮亭者信矣公著有賞雨茅屋詩集二十二卷駢體文二卷續金山志十二卷又選刻蘇文忠公奏議二卷虞文靖公詩集八卷呂子易說二卷江右八家詩八卷朋舊遺詩十八卷江右詩徵一百廿卷

國朝駢體正宗十二卷皆行於世唯選批

國朝詩爲清真集者未竣事

包世臣曰公二子皆晚生從弟斌官水部未嘗從公宦遊故具狀不能詳行治按

國史館例官二品皆據紅本及軍機檔以立傳則公之政事自在良史非私家所能增損公任都轉時余嘗朝夕讀公詩詞聞公談議殊不以離官爲樂其意蓋欲大有爲者陳臬以後相去遼遠信問阻越然余客百文敏公兩江節署語次及粵東平海事文敏謂委署支調公常拘牽成案以掣其肘頗銜公文敏氣餒逼人舉事多任意同城官之將軍巡撫莫敢立異同而公爲其屬獨

能舉方伯之職是亦一節之可見者矣

趙提刑家傳

公諱仁基字厚子江蘇武進人系出宋魏王康熙中有
任戶部尚書謚恭毅祀賢良祠海內稱爲名臣者公之
五世祖也祖滙增監生考鍾書舉人任豐縣訓導保薦
知縣俱以公貴於山西平陽府知府任內贈如公官祖
妣楊妣惲俱贈恭人公少穎異好讀書長六尺白晳豐
下趙故舊族足科第然軀貌率短小公居羣從間丰儀
偉岸見者知爲大器成童侍贈公之豐縣任贈公俸滿
膺保薦里居候銓公卽橐筆遊湖北特脩脯給菽水故

食貧又客遊久悉民間疾苦道光乙酉舉於鄉丙戌成進士以知縣發江西卽用初署宜春旋補崇仁會秋讞所部民有於隣縣犯絞者解省時中途逸歸公偵知密捕追蹤至湖南之湘潭而獲之以歸鄰縣鄰縣得不被議論者以爲難未幾部選之安徽涇縣知縣迴避巡撫與公對調先是涇屢構巨案公在任三年邑無大獄上游以爲能調懷寧懷寧治附省郭瀆大江奸宄之所出入江蘇桃源有決河要犯陳端逋誅日久公捕得之奉旨賞戴花翎以直隸州知州升用遂擢滁州入都蒙召問家世知爲恭毅公後

溫諭有加時以爲異數調署六安州旋奉

特簡升山西平陽府知府抵任未匝月復升授江西贛南吉寧兵備道兼理贛關道境間於閩粵民驚悍輕犯法然終公之任惟泰和縣有梟徒戕卡弁之變公馳往督捕首從悉獲此外尠有巨案較前此爲安靖矣及英夷在粵滋事擾及浙閩公義憤中積常憂形於色及南安設糧臺公奉委襄理悉心檢核積勞致疾道光二十一年六月初二奉

旨授湖北按察使時公病日甚延至十九日遂不起距生於乾隆己酉六月廿二日年五十有三配高氏繼錢

氏俱贈恭人再繼方氏例封淑人子三長鑄早殤次熙
文烈文俱幼俱方淑人出女子子三長純璧適陽湖縣
增生李嶽生子友李兆洛申耆之姪孫次紉珠適陽湖
附生周璵子友周儀偉伯恬之叔子次細瓊字江西安
福縣附生阮泳經公性嗜詩有幽棲集一卷登樓集一
卷折腰集二卷耶邪集一卷姑射集一卷崆峒集一卷
詞一卷雜文二卷皆藏於家九疊山房和陶詩一卷已
板行而予皆未見公任懷寧時連年被江災著江水論
十二篇識者以爲得江水致災之源云

包世臣曰予客遊數過常州公之諸父及羣從兄弟姻

戚有學者多與予交善獨於公未嘗一面及公宰吾
涇接人士語次必及予殷拳備至而予適挈眷僑揚州
逮予薄宦江西公監司南郡相距較遠故不能悉公之
治蹟然予滯迹豫章見公之族戚赴虔者往返絡驛公
凶問至常州之留豫章者皆爲嘆息近世卿大夫身履
華靡而厚自封殖視所親如陌路者比比也公起於寒
賤旣顯貴其卒也幾無以斂而篤於睦嫻如此其古之
所稱長者歟故據來狀次爲篇

皇詔授資政大夫廣東布政使司布政使軍功隨帶加

一級熊公墓誌銘

公諱常鎔字象于一字椒實號聲谷姓氏江西南鉛山人也態氏自宋居南昌康熙中有紹鳳者捉店鉛山爲其土人章氏壻遂家馬其後爲鉛山人實公高祖曾祖熙材妣陳氏遣金氏祖枚乾隆辛卯進士授刑部主事仕至刑部尙書追贈三世皆光祿大夫章陳金皆一品夫人以尙書爲金出故也考培封文林郎贈資政大夫妣黃氏封太恭人晉贈夫人尙書未通籍時讀書山寺與其老僧善一日尙書自家還寺塗遇老僧與之言不答而行如飛甚訝之比入寺門知老僧已圓寂其徒致遺言曰丁未年當再聚公之誕也適當是物尙書咳然

曰是老僧再聚耶挈以隨任當尙書承宣安徽時巡撫
爲大興朱文正公知人好士宇內之所宗師及公入都
文正至澄懷園與其孫涂同學於故協辦大學士蕭
山湯金間自課其詩文初章夫人苦節撫五子寢甚
嘗歎曰椒五粒豈無一辣者旣而其季負販得鉅金於
路物色還至章夫人欣然曰辣者其在是矣是實生尙
書文正習知其事涂字蘭實文正遂更公字曰椒實命
之曰字以敬名當念汝祖德也丁卯領鄉薦己巳成進
士改庶吉士辛未散館授編修旋聞封君訃去官甲戌
服闕補原官己亥充

國史館纂修丙子充本衙門撰文派辦院事戊寅充雲南鄉試正考官己卯

京察一等以道府記名是秋奉視學廣西之

命癸未差竣

記名御史旋蒙

簡放陝西漢中府遣缺知府比至陝而漢中缺係奏升遂留陝候補未幾西安出缺疆吏以公在省識獄明達遂署首府事甲申六月兼護鹽道九月補榆林榆邵地多斥鹵又時有榆溪水患公疏渠以資溉築堤以防漲水利既得變瘠爲腴又捐廉創義倉民從勸諭不勞而

集事乙酉冬護理延榆綏道以新疆南路逆回滋事徵調邊營卒旅於例外需索有司不能供因大噪公申明紀律懲其渠乃定丁亥八月調西安時撤還東軍絡驛不絕及戊子五月俘送逆酋張格爾供億護軍九旁午倥偬公督辦既無貽誤而本屬公事及一切發審之案鉅細畢舉大吏奇其能保敘軍功隨帶加一級復首列計典薦牘焉己丑冬太恭人棄養壬辰入都補行卓異引

見旋奉

簡放山西蒲州府次年秋調太原先是大獄屢興首都

被議者相繼羣視爲畏遂公從容受事閱三載竟無京
控案乙未春趙城變起倉猝人心洶懼公鎮撫之省垣
民倚以自安繼積雨壞汾河田廬城垣皆被浸公設法
防堵賑卹賴以不害公念災至而捍禦不若先事預防
之爲得因議濬築兼施疏尾閘以暢宣洩植蒲柳以固
隄防至今賴之丙申擢山西冀寧道是秋署按察使事
丁酉署布政使事值巡撫北閩兼代行院事秋擢直隸
按察使冬以陸費瓌升浙江按察使迴避原籍與公對
調公因赴浙適浙江布政使程喬采丁外艱公署其事
未期擢廣東布政使時粵東以查辦鴉片英夷逆命徵

調召募籌撥支應馳驅海壖積受風濕冬杪忽中急風
請給調治庚子春假滿不痊請開缺以五月五日痰湧
卒於藩署年五十有四歲配南城曾氏貴州巡撫煥之
愛女誥封夫人子三長存澤次存泰俱國子生次存瀚
已亥舉人女子子一適江蘇按察使張晉熙孫三爲篋
有筠文策孫女一俱幼存澤等以某年月日葬公於某
原禮也公以貴介起家歷躋清顯居外任唯榆林爲瘠
最後至粵東多賣之鄉而歸櫬之資實藉寅戚賻贈眷
屬賃寄豫章無一椽之宅憶嘉慶丁巳冬初余甫弱冠
應文正公召至皖尙書聞聲相求次日予走答尙書命

公出見年十歲眉目如畫戴高梁帽衣紫布袍紅青布
套帶銀項圈倚肩立尙書曰吾子試使之背周禮余抽
問五六事公琅琅背誦雖序官無錯誤余起賀尙書歡
甚以承宣愛孫而衣飾如韋布尙書儉德之可風也而
公履豐厚數十年不事封殖可謂無忝爾祖者矣是宜
有銘銘曰

嗚呼人之生也有以爲施也抑以爲報而其報也或以
前生之苦行或爲先世之永好其宜也熟蓄之其茂也
熟膏之其來也有自其去也有歸造物者不以我告而
吾於熊公省其機已

皇諸授朝議大夫江蘇松江府知府加二級蔘村李君
墓志銘

君諱宜範字君式號蔘村安徽宣城人也其源出隴西
至宋有令旌德者曰份子孫遂居其邑之湯村明末有
孝子曰廷臣者自湯村遷宣城西門內始爲宣城人至
君凡六世祖夢夔縣學生員考承時並以君貴贈如君
官祖妣張贈恭人妣王封太孺人贈恭人君五歲而孤
家赤貧乾隆癸丑君年僅十九貿貿走都下傭書爲生
久之考取內閣供事積勞送

國史館議敘未入流卽選嘉慶庚午選山西孟縣芹泉

駙駙丞兼巡檢事乙亥遷豫東例捐升縣丞丙子遷江
西南昌縣縣丞庚辰代理永寧縣知縣道光辛巳土恭
人在署棄養歸葬比服闋遵常例分發直隸委用丙戌
委辦天津海運局事得儘先是年九月代理南皮縣知
縣丁亥署大名府經歷是年七月代理清豐縣知縣旋
補房山縣縣丞庚寅以防永定河汎安瀾功以知縣儘
先升用辛卯署順義縣知縣壬辰署良鄉縣知縣調密
雲縣縣丞癸巳坐升密雲乙未調寶坻丙申署通州知
州丁酉升授通州戊戌兼署東路同知是年十二月調
涿州己亥冬奉

特旨簡放江蘇蘇州府遺缺知府庚子春抵江蘇補松江府知府四月抵任未幾遭末疾五月乞假就醫遂回籍以壬寅九月二十日卒於里門年六十有八配同里丁氏前卒贈恭人繼常熟倪氏封恭人子一棟豫工例候選知縣女子子二俱適宦族孫五某某女孫一俱幼

棟將以甲辰年 月 日葬君於建平縣南鄉史家壩之原先期具狀請銘予按狀君以無藉入都泊出都完娶奉母氏盡室寄都下備嘗艱辛者十有七年得一官浮沈佐襍又廿有三年乃專城而居閱八年遂領大郡當其綰黃綬也雖代理永寧南皮清豐三縣事代理例

不支廉俸不主徵收且俱止二三月無可短長及署順義良鄉補密雲調寶坻擢通調涿事可自爲而缺皆極瘠又通爲漕委涿首孔道星使台司冠蓋常絡繹而君迎送有隙勤民事無怠倦民甚宜君以得擢優郡蒞任月餘遽爾遺疾原佐襍例禁擅受其能守舊章收規費者已爲完士而君在芹泉拒賄厥規在南昌司老民堂不擾孤貧之利及擢密雲以其地逼沙塞文教僅陋集紳士興書院嚴課核使諸生登賢書者相繼在寶坻拓義塚設藥局棺局一皆捐廉爲得每屆升調奉檄卽行倉庫公事無虧缺歸里後未有一椽之宅碩菑橐以建

宗祠置祠田備祭掃周卹之需皆常情所難至其緝捕
匪徒常先隸卒奮前不顧讞寃獄苟得情必絕瞻徇委
曲白憲府直之與尋常已行無留事牒狀頗詳具然循
分供職之常也故不著著其且銘者銘曰

耳目所寄苞苴集苞苴既通耳目塞實論優瘠名繁簡
舍名取實任自擇善事上官優更優勤求民隱瘠彌瘠
共逐頹流爭苑枯誰向窮檐哀跼踖李君晚節似朝隋
移瘠入瘠毗赤畿善哉竟不受瘠累子孫世傳清白吏
皇詔授通議大夫按察使銜陝西鳳邠道查公神道碑
道光辛丑九月十三日前陝西鳳邠道加按察使銜查

公卒於白門僑第其孤同知銜江蘇卽補通判德基侯
選布政使司經歷德本卜吉於城東武岡山麓以癸卯
月 日舉葬旣藏事涕泣來告曰先大夫生平相知
之深無如表叔當世任斯文之重一言不苟下可以信
今傳後亦無如表叔今窀穸已安而墓表闕如敢以請
按公於先母氏爲族子里居相距僅二十里嘉慶甲戌
相識都下論議如笙磬相得之歡親弗中無與比者雖
衰頹不文固無以辭爰述予所習知而確鑿有據爲天
下共聞見者編次之以授德基使刻貞石於墓道以告
後來曰公少小孤羣羣從莫相恤不能卒儒業乾隆已

西甫弱冠徒步五千里入閩投所親既至則無可弛擔者寄逆旅傭書以就口食好問好察漸通曉時世事以書記游小吏署數年爲福州將軍魁倫所知延入幕府爲腹心之友乙卯閩中大獄自浙起

上悉逮諸大吏而以魁公署督事主其獄閩中州縣少自然之入厯任大吏責供張無藝縱所屬羅織大戶勒鉅賄民不堪命是獄旣結正貪酷之吏悉伏辜其風遂息閩民始有生人之樂矣大吏繼至者爭客公復釀金援例以通判留閩嘉慶乙巳鉅盜蔡牽殲於海常路歸籌策功於公拜五品頂戴及花翎之

賜牽平後南洋惟朱渥爲猾賊欲歸誠而無可託命者
公旣得要領隻身至舶上見其男婦諭以禍福遂受降
而返洋氛靖以至今壬申署臺灣淡水同知下車卽訪
獲妖言惑衆之高媽達訊得劉林祝現定以次年閏八
月望在都舉事四方起應之情通詳請奏劉林者林清
別名也上游以其語不經僅照尋常傳教例論決及癸
酉十月臺灣聞都中九月十五之事而高逆伏法後其
黨已解散竟得不起假疆吏據實入告先事撲捕何至
噫血

闕廷毒流三輔哉其甚者癸酉九月十四日蘆溝橋巡

檢飛報祝現等奉林清命定十五日午時進

宮滋事黨羽本日已入城而兼尹尙書並不部署防衛
唯以事宜委婉勸諭不可冒昧聲張釀巨變爲批荅又
前此陳德之變雖

睿廟至仁包荒然其事卒疑不能明及癸酉八月代理
山東金鄉縣吳堦捕獲逆目崔士俊究出嘉慶二年陳
德偕祝現林清至崔士俊家住一月趕車者爲支進才
始知陳德本林清逆黨並無別故而東撫以事屬既往
刪不入奏使陳逆疑團至今莫釋近世大吏遇小民茹
素祈福者莫不張大其詞以銜能邀功至於防微杜患

別嫌疑機括攸關至鉅者則慮其別無證據事難收拾
置不問以貽伊戚比比然矣甲戌公當以道員謁選乃
去閩需次都下丁丑選河南南汝光道已卯恭值

唐廟六旬萬壽普施惠澤免民間積逋河南例有幫河
工料價攤徵民間逋數甚鉅又山東以竄入官虧奉

嚴旨河南因惶惑不敢發時公以攝臬在省力持項上
益下之義疆吏夙重公卒用其議雖不盡如指而案得
照覆實惠及民爲十八省之冠老教頭劉松之緣坐子
逃遁劉文煥數十年海捕無獲公偵知其傳教於安徽
之宿州委員往捕解豫訊辦未定讞而公奉太淑人諱

去官然邪教根株至此遂淨盡道光壬午服闋謁選得陝西鳳邠道乙酉逆裔張格爾擾新疆南路調主嘉峪關軍需局事自川楚軍興費帑累大萬與軍事者莫不饒沃將吏習川楚之故支銷多重複公不避嫌怨核實應付大兵出關時僉謂當僱長馬駝送軍裝公以內地馬不習關外寒苦必多倒斃且關外臺站皆有伺應關內長僱到彼不適用唯增餼養費開銷重沓不便議者無以屈節帑至二百餘萬兩事藏敘功加按察使銜公在監司任內攝豫臬者一攝秦臬者三凡案有疑竇皆於初詳指駁使屬吏得研審更正招解後無復翻異以

故得依限完結官民胥免拖累焉乙未公年六十有八
懸車遂初本籍故無田宅卜居白門青溪之側計公幕
閩二十年官閩十年官豫一年官秦十二年先後決大
疑捍大患飭官方以甦民氣靖伏莽以奠民生皆持大
體不事聲色然初爲丞倅卽係理民劇任洎當刑名總
漕地雖能者苦叢脞而公卒未嘗以公事累纖芥吏議
其謹細愼微檢點周至又有如此者公幼歷艱辛未得
博涉書史出門同人始乘暇隙親羣籍而吐屬爾雅翰
札雋妙館閣諸公罕能及者從前爲諸侯客雖被信任
專而且久然因人成事豈能盡如我意及任監司攝提

刑又事事須關白取進止若以公之才識閱歷獨當一面則功業可以廣暨而限于資格又所居已僻莫能爲推挽者故所就遂止於是然被其澤者歌咏慈祥聞其風者企仰俊傑吾鄉先達有趙先生青藜以編修改官御史勿欺而犯權貴側目能不負所學葉先生居仁以進士官廣東知縣清操自厲誠格幽明惟公通人情達事變與趙葉兩先生前後鼎立爲吾鄉之偉人矣公安嶽涇縣人諱崇華字九峯晚號實庵年七十有四

李鳳臺傳

君諱兆洛字申耆姓李氏江蘇陽湖人也本無錫夾山

王氏明神宗時有本成者育於武進三河口李氏遂冒
李姓武進分陽湖三河口屬之故爲陽湖人祖衍曾國
子生貽贈奉直大夫父徵蘭陽湖學生封奉直大夫妣
奚贈宜人娶宜興路氏封宜人子二顓前歿願國學生
女一邊同邑陸佑麟孫六曾孫二君短身碩腹豹顚剛
目面麻黑望之峻聳若不可近而就之和易終日手口
無停輟而未常有疾言遽色幼聰慧好讀書日能熟百
餘行予以嘉慶庚申識於白門壬戌過訪主其家七閱
月徧檢其所藏書卷逾五萬皆手加丹鉛校羨脫正錯
悟矢口舉十三經辭無遺失上自漢唐下及近世諸儒

說條別得失不檢本尤嗜輿地學備購各省通志較互
千餘年來水地之書證以正史刊定顧祖范讀史方輿
紀要之與原史不符者並世先達唯開化戴簡恪公友
生中唯吳沈欽韓文起記問差足相上下餘無能爲倣
似矣而慮以下人見一材一技殊么小而君盛推掖獎
借自以爲不及子稚於君六歲所學至淺陋而君見說
儲稿本謂其慮周亭林詞燒敬輿以塗改勾剔甚蕪累
手爲繕清至十餘萬言楷法一本勃海十日而畢予逢
人誦說曰以能問於不能以多問於寡有若無實若虛
吾申耆其幾近之聞者駭然久之則皆以爲知言也成

童應縣試陽湖令陳君見君年最少而投卷太速疑之
君應答如流陳君欵詢家世曰汝可卽歸吾不招覆汝
矣通場雖皆未投卷然知必無及汝者招覆非第一不
可汝童年初試卽蓋一邑非吾之所以期汝也卽在廳
事書聯爲贈曰他日定成名進士乃翁真有好兒郎一
時傳爲佳話旋丁奚宜人憂服闋赴試督學使爲仁和
胡文恪公奇君文旣首擢及發落文恪已將君原場及
覆試卷刻成九學諸生各給一本曰歸家熟讀之若毋
薄李生新進老夫衡文半天下未見有如李生者矣嘉
慶甲子應江南鄉試領解乙丑成進士改翰林院庶吉

士戊辰散館一等授知縣選四川親老告近改安徽鳳
臺鳳臺爲壽州分縣民悍同壽而地特瘠君蒞任知漢
芍陂在邑境勘之今名焦岡湖濱淮而山崗環繞易爲
旱潦君增隄防設溝閘督耕耘民以有歲邑多豪猾爲
逋盜藪者相望君常騎率健勇循行閭里每出不意得
其魁又察其中有重氣節矜然諸者撫用之盜以斂戢
辛未秋百文敏公任兩江督先是儀徵有刦殺巨案戕
一家三命文敏偵得兇盜爲蒙城人而匿鳳臺嚴檄兩
邑限一月捕送君偵知容隱兇盜之巨猾不受捕乃召
撫用者至內室賜之酒饌曰吾當解組歸里門故與若

作一劇飲受撫者怪語不倫請其故君示以督檄受撫者曰役故知其人匿巨猾家然力不能取君曰若力能取者吾早以捕事責若矣吾卽去此若亦不能終做好人故與若作別耳受撫者嗚咽良久曰有一計或可試收役家屬於獄而發硃簽諭役往然三日不回則役死猾家已役之妻若子可終身伺應夫人公子俱灑埽幸得延宗祀君諾之猾家距城廿五里受撫者卽日至猾家猾欸之曰雲泥路隔已三載何幸臨此得毋爲儀徵案耶示以硃簽猾曰信在此可召出共飲而商之兇盜出則曰我公之新友而彼則舊友且我一身而彼一家

顧爲新友之一身陷舊友一家乎我卽從入城耳次早
猾遣長矛二十護送至城門而返蓋兇盜至趨勁猾恐
受撫者非其敵也君初遣受撫者下鄉卽於署內製堅
檻並集舁者護者百餘人以需受撫者引兇盜至君適
在廳事讞他獄一訊名姓立檻解蒙城而身督護送鳳
臺去蒙城七十里中道有鎮爲分界所檻車入飯店君
降輿當門坐環觀者如堵君曰此巨盜斷不能捕而我
竟捕得若等知吾樂否取巨觥痛飲又命侍者酌飲其
父老與話嘈襍不可休醉甚乃升輿前行猾已遣數十
健者來刼見君攔店門轟飲遂出鎮外候良久君輿過

猾黨問檻犯何向不來荅以隨後猾黨返至店則早已
毀店後牆昇檻車前去計且抵蒙矣猾黨既返君卽改
乘快馬疾馳至蒙會蒙令受兇盜詞卽聯銜會印通詳
聲明鳳邑捕得遵檄交蒙邑轉解儀歸案君返鳳之次
日兇盜越蒙獄蒙令先以虧缺奉督院嚴詰事未竟又
失兇盜遂縊君嘗語予曰鳳潯泗三府州揀集五千人
可以方行天下然唯其豪能用之官用之必帥至千里
外或客兵勢盛足相鈐制乃可否則驕蹇難爲降伏已
然則君真體察北方强者之性情至熟易故機一發而
必達非徒恃智若鏃矢已也甲戌君奉奉直君諱去官

以交案羈滯歲餘服闋例還原省君無意出山而鳳臺
猶有官項就館數年以脩脯補虧缺官事竣遂旋里江
陰延主賢陽書院居之二十年而卒於家年七十有三
歲君爲諸生每試必冠曹士論謂君文利小試遣子弟
從君遊求弋獲技故前後從者數十無能受君之學者
及主講暨陽江陰人士頗能信受毘陵之雋亦從而假
館四方艤舟問字者無虛日君乃得各就性情所近分
途講授就染旣久多有能得其一體者古今文辭行世
者君無不披覽時論盛推歸方崇散行而薄駢偶君則
謂唐宋傳作皆導源秦漢秦漢之駢偶實唐宋散行之

祖與子持論若笙磬而子以辭達爲宗君則規撫體勢
朋儕中能文者偶過君君輒仿其章句至本人不能辨
亦以此少所自得唯官鳳臺時譔邑志十卷晚年校刻
輿圖督造天球爲精心之作君名日益重求文者接踵
君自信其文非行遠遂亦不甚珍惜點竄來狀率如人
意付去卽棄稿門弟子各私錄副或有檢得於故紙香
咸寶守之君旣卒首選弟子蔣彤爲年譜一卷又述平
日所聞仿宋人語錄爲暨陽問答二卷郵致乞志墓其
明年薨子衡又爲行狀而高承鈺哀輯同門所藏君文
以聚珍板排印爲廿六卷猶以君文多散軼爲憾欲隨

訪隨續俟備更付梓氏郵排印本來乞傳道光甲午春
予過常州以張館陶墓表郵書質君覆云衰頹已極不
數年卽當以此事相煩是君固早命之矣予無以辭故
編次所習略不取材譜狀以傳君之真焉道光乙巳八
月望包世臣書

增張曜孫楊傳第男誠

諸名
家仁

家丞

諸名
家讓

校字